

【茶山情緣創作理念】

1. 「茶」與客家人的生活息息相關，也因為「茶」而發展出許許多多特有的客家「茶」文化，客家傳統採茶大戲即是一個很鮮活的客家文化藝術，其中「採茶腔」更是客家音樂中的經典。
 2. 新竹縣北埔和峨眉兩鄉是一個以茶香聞名的鄉村，當地出產之「膨風茶」（又名東方美人）風味獨特，名聞遐邇。此處亦是獅頭山國家風景區所在，風景秀麗，生態豐富，客家先民的歷史與傳說故事篇篇動人。
 3. 因自小生長在客家村落，幼年的生活經驗和對茶的濃濃情誼，總想為故鄉做些什麼，值此良機，遂自編「茶山情緣」的客家傳統採茶戲來追憶昔日情懷，也藉此將地區產業文化加以推廣，盼結合社區活動發展觀光產業，讓藝術和產業相結合，更豐富客家生活。
-

【茶山情緣故事大綱】

茶山貧苦人家平日以種茶、採茶、製茶為業，生活清貧，但安貧樂道。黃連坤和徐秀才結為同年一起遷居到茶山落戶，黃連坤妻子早喪，獨自扶養女兒黃蘭英，徐秀才亦因病亡故，留下妻子獨自扶養兒子徐紹雲。徐紹雲和黃蘭英青梅竹馬，已過成婚年紀，因家貧至今尚未婚娶。黃蘭英好友溫秀琴、溫秀鳳姐妹，歌聲清亮，聰明勤奮，於茶園以歌會友結識挑夫陳阿龍和李阿保。溫家新雇主之贅夫范增，仗勢欺人，欲強娶黃蘭英為妾，而此時，徐紹雲家茶園卻慘遭茶蟲危害，經濟上雪上加霜，徐黃兩家禍不單行。貧苦的客家人總是不向命運低頭，在艱困的環境中想方設法克服困難，展現客家的硬頸精神。天助自助，因緣際會，徐黃兩家終於克服蟲蟲危機，危機變為轉機，製作出風味獨特的～膨風茶。忌妒的范增欺騙村人去圍毆徐紹雲，幸經溫家姐妹們出面相救化險為夷，而貪色的范增也遭報應被王家休棄。茶山人家因茶而締結良緣，傳為佳話。

【茶山情緣】人物表

人物	腳色	性格特徵	備註
阿土	丑	詼諧風趣	
阿土嫂	彩旦	詼諧風趣	
徐紹雲	小生	勤奮正直的茶農，家境清寒，與黃蘭英相戀。	
黃蘭英	花旦	溫柔貌美的採茶女，家境清寒，與徐紹雲相戀。	
黃連坤	老生	草藥郎中，黃蘭英之父。	
范增	丑	大地主王綢緞之贅夫，不學無術，懼內又好色。	
張煥	丑	范增跟班，地痞流氓。	
溫秀琴	花旦	採茶女，黃蘭英好友，勤快聰明。	
溫秀鳳	花旦	採茶女，溫秀琴之妹，活潑可愛。	
陳阿龍	武生	挑夫，身強體健，喜歡上溫秀琴。	
李阿保	武生	挑夫，身強體健，喜歡上溫秀鳳。	
徐母	老旦	徐紹雲之母，慈祥和藹的老婦人。	
王綢緞	丑旦	醜陋但精明幹練的大地主，招贅范增為夫。	
梅香	花旦	王綢緞俾女	
媒婆	彩旦	以做媒為業的老婦人。	
打手	下手	范增請的打手。	數人
迎親隊伍	雜役		數人

茶山情緣劇本

棚頭

景：街景

人物：阿土哥 阿土嫂

△阿土哥上

阿土哥唸：嗯嘿！大隘地區好地方，山明水秀係隻客家庄，
峨眉溪，溪水清清就像夫人頸纏个絲巾樣；
五指山，五指參天就像如來神佛个手巴掌；
還有一座獅頭山，惦惦仆佇苗栗佬新竹个半中央，
山頂石巖盡大又盡妥當，抵水遮日、念佛修身最好个地方。
食齋人在石巖起廟做齋堂，勸化世人做人要正當。
老石屋位在最頂岡，上山个石斷又企又當長，
實在難為个兜齋姑佬和尚，略下人蹶就蹶毋得上。
大隘山肚野生盡多大香樟，樟樹倒下來，
剗到一皮一皮，焗腦油來賣外庄，
透蟲、除蟲、防蚊，大家清潔就較有保障。
俛山兼山，客家先民煞猛勤儉毋會呆，
企企个崎仔就來打斷，柑斷、茶斷還有蕃薯斷，煞猛就有好食糧。
除了山排、山斷還有耕種最好个地方，就係河壩唇頭个田洋。
南埔、北埔、月眉還過褲浪埔，
腦油、柑仔、甘蔗、禾仔、茶米並香菇，
大隘地區產業真豐富。
百姓安居樂業無愁又無慮，食飽夜後弦仔就夯來鋸來夯來鋸！

△阿土嫂上

阿土嫂唸：啊喔！聽汝講到恁沙屁，毋知个人俛到汝係萬戶做大生理。
麼个無愁無慮弦仔夯來鋸，嘛人像汝恁懶屍，
食飽過家，膨風、痲痢，滂滂又滂滂，
汝就無想厝逐日做到半生死，
田頭園尾、灶頭鑊尾、針頭線尾，
三頭三尾，項項厝就做到畏。
厝嫁到汝斯衰過無人知！

△【老山歌】

阿土嫂唱：老公逐日走四方，遊遊野野真放蕩。

厝無閒直掣掣轉，汝毋曉佬厝來幫忙。

阿土哥： 哺娘姐，汝莫怨怪來莫受氣，換領靚衫厝渡汝上街去。

阿土嫂： 唉哉！講到恁好聽哇！麼个換領靚衫要渡厝街項去，汝麼个時節拿錢轉來分厝使，厝哪有閒錢去買靚靚个衫褲？

阿土哥： 叻！厝上隻月毋係分汝兩角三？

阿土嫂： 兩角三？汝恁大个錢哪，買米都毋罇，買鹽个錢還險險要佬人賒！

阿土哥： 汝仰使佬人賒？厝爸厝姆過身以前，交分恩俚一儕一隻箱仔佬鎖匙，箱仔底背肚个錢銀，一生人也使毋忒。

阿土嫂： 汝這落水天降个沒子弟正好，祖公留下來个錢銀若毋係厝掌等，金山銀山，早就分汝敗淨淨春無半鮮。厝箱仔該兜錢要留分賴仔妹仔結婚買屋用个，做毋得動佢！

阿土哥： 厝晡娘姐還會做家！好哪！厝前兩日買彩券著到第三獎，今晡日廟項做鬧熱，厝渡汝去戲棚下食山楂看採茶，順續到街路剪幾坵仔花布轉來分汝做新衫，好無？

阿土嫂： 恁樣還差毋多！

阿土哥： 好！晡娘姐，滕厝來呀！

阿土嫂： 阿老公，帶路哪！

阿土哥： 哈！哈！哈！哈！

△阿土嫂、阿土哥同下

第一場 採茶

景： 山景

人物： 溫秀琴、溫秀鳳、陳阿龍、李阿保、范增、張煥

△OS【老山歌】： 摘茶愛摘兩三皮，
三日無摘老了裡。
滿山茶園青麗麗，
趕緊請人摘轉去！

△溫家姐妹歌舞上唱【十二月採茶】

姐妹同唱： 姐阿妹簍公背等行喔哪啊……哪哎呦呦，
要到山排大嶼頂喔哪哎呦，
山頂茶頭葉盡靚喔哪啊……哪哎呦呦，
定定摘來莫用綁。葉盡靚，莫用綁，
定定摘來莫用啊…綁喔哪啊……哎呦莫用綁喔。

溫秀琴： 老妹！

溫秀鳳： 阿姐！

溫秀琴： 聽講有一个大財主搬到這就近來，這坵茶園已經換佢做主人囉！

溫秀鳳： 恩俚佬人摘茶分人請，只要有工錢好拿，頭家係嘛人有麼个相干？

溫秀琴： 嗯！新頭家會算會除，今年个春茶價錢賣到意好價，這夏茶又生到

恁靚，無遽遽摘起來，老忒就打爽，故所佢吩咐工頭，喊恩俾佬蘭英今晡日要較煞猛兜仔，講唸頂這埕茶園全部要摘忒佢呀。

溫秀鳳： 啊！恁大埕个茶園今晡日全部要摘淨淨喔？蘭英姐今晡日朝辰過去徐紹雲屋家幫忙無來，減忒半工人，恁趕事，頭家有算較多个工錢無？係無檢較多工錢，厝無愛摘喔。

溫秀琴： 有啦有啦！蘭英該額恩俾較煞猛兜仔忒佢，佢个工錢會分恩俾兩儕忒啦！

溫秀鳳： 恁樣還差毋多！

溫秀琴： 盡趕事，遽遽摘啊！

△溫家姐妹接唱【十二月採茶】

摘茶手花軟又靚喔哪啊……哪哎呦呦，
箕公摘湊要來摒喔哪哎呦。
滿山尋無茶袋裝喔哪啊……哪哎呦呦，
茶袋還佇路上行，無茶袋，路上行，
茶袋還佇路上啊…行喔哪啊……哎呦路上行喔。

溫秀鳳： 喂！挑茶个阿哥，厝兜箕公湊咧要摒茶，茶袋遽遽送上來！

△挑夫上唱【挑擔歌】

挑夫： 來咧！
挑擔要挑來咳咳呦竹擔竿哪吼唏咳，
中央挑等來渺啊渺仕工尺兩頭軟哪。
阿妹喊厝來咳咳呦聲盡亮哪吼唏咳，
阿哥聽到來渺阿渺仕工尺喜歡歡！
挑擔要挑來咳咳呦竹擔竿哪吼唏咳，
捉弄阿妹來渺啊渺仕工尺無相干哪！
山路行等來咳咳呦一身汗哪吼唏咳，
想要茶袋來渺啊渺仕工尺要用換哪！

陳阿龍： 著著著！恩俾來默耍佢兜。

喂！摘茶个細阿妹仔！汝兜想要用茶袋就要佬厝兜用換个！

溫秀鳳： 姐姐，該兜挑茶个阿哥掙（diong✓）人，毋分恩俾茶袋，講要恩俾用換个。

溫秀琴： 待我會會佢兜！

喂！挑擔个阿哥！厝兜無帶東西出門，無東西好佬爾兜換，茶袋先借分厝兜用，東西下二擺正分爾兜好無。

李阿保： 呦～無帶東西，該厝兜續剪到咧，做毋得！

陳阿龍： 無就佬厝等對唱山歌，係唱贏厝等，毋單淨茶袋分汝等用，厝等還去佬汝等幫忙摘茶。

溫秀琴： 如此，挑擔哥，請汝等出題來！

△【老山歌】

陳阿龍：聽等！

唱：四四方方一張檯，年年讀書厝也來。
佢讀三年毋識字，厝讀三年中秀才。

白：換汝唱！

溫秀琴唱：書桌四方一張檯，年年讀書汝也來。
汝讀三年中秀才，秀才掙人換茶袋。

李阿保：唉！汝分佢比下去咧，換厝來！

唱：有隻東西盡生趣，毋好早來就好雨。
有肚屎來無肚臍，有目珠來無目眉。

陳阿龍：嘿！這係麼个東西，汝等遽遽團！

溫秀鳳：姐姐，換厝回佢。

唱：蟾蜍無愛早來就好雨，有肚屎來佢就無肚臍，
有目珠來又乜無目眉，夯等擔竿掙人無面皮。

溫秀琴：罵得好！

陳阿龍：壞蹄咧！佢罵恩俚係癩蛤蟆呢！

溫秀琴：喂！挑擔个阿哥，敢係輸毋起？茶袋遽遽送過來！

眾挑夫：唉！偷雞仔毋到做忒一抓米！

△眾挑夫送上茶袋，採茶女擷茶入袋。

李阿保：厝安到李阿保，佢係陳阿龍，敢問姑娘上姓大名？

溫秀鳳：佢係厝姐溫秀琴，厝係老妹溫秀鳳。

陳阿龍：原來係溫家姐妹。

溫秀琴：方才多有得罪，大哥莫怪。

陳阿龍：豈敢！兩位姑娘真是好口才。

溫秀鳳：這係佬蘭英姐過紹雲哥兩人學來个。

李阿保：佢兩人才子佳人意有名聲，可惜厝兜無緣相識。

溫秀琴：汝兜佬厝幫忙摘茶，厝就佬汝兜引見。

陳阿龍：願賭服輸，厝兜本來就要摘茶認輸，能得結識才子佳人，真是一舉兩得。

李阿保：毋係啦！係一舉”多”得。

陳阿龍：著著著，係一舉”多”得。

溫秀琴：見笑了。勞煩大哥幫忙摘茶！

眾人：摘茶！

△眾人採茶科。【緊十二月採茶】

合唱：六阿月採茶茶葉長，茶山嶼上好風光，
同妹（哥）山歌來對唱，採茶心情喜洋洋，
來對唱，喜洋洋，
茶山嶼上好風啊…光喔，哪啊……哎叻好風光喔。

△范增 張煥上

張煥： 喂！汝兜挑擔人啊，頭家出錢請汝兜來佬摘茶个細妹仔唱山歌交情个係無？

李阿保： 汝係嘛儕？哇哇嘶嘶，厓看汝鼻空三隻空！

張煥： 大家鼻空都兩隻空，做麼个厓个三隻空？

李阿保： 汝啊～多管！嘛个名報上來！

張煥： 哼！門縫看人佬人看扁！厓啊，厓安到張煥。這歸片仔所在已經分厓頭家娘買下來，汝知這嘛人無？這就係汝兜新頭家个老公，范增范老爺。還毋過來見禮！

眾人： 新頭家？哎，見過范老爺！

范增： 汝兜還毋遽遽去挑擔？

溫秀鳳： 唉喲，頭家老爺啊！佢兜佬厓兜幫忙摘茶，歇暍一下仔無打緊啦！

張煥： 做毋得！茶菁無煞煞挑轉去殺青，放佇茶袋餽太久會紅忒，做出來个茶賣無錢會蝕本，蝕本个生理厓頭家娘毋會做。還毋遽遽挑茶轉去！

眾挑夫： 嘿！

溫秀琴： 眾位大哥，好生行啊！

△范增左顧右盼做尋人狀，張煥看溫家姐妹看傻，陳阿龍故意用扁擔撞張煥跌倒。

陳阿龍： 嘿！一个范增（飯甌）、一个張煥（裝飯），狗仗人勢！

△挑夫下，張煥掙扎爬起來。

張煥： 高毛子啊！

△范增打張煥科

范增： 汝仰罵厓高毛子？

溫秀琴： 頭家！高毛子毋係罵汝个。

范增： 高毛子罵嘛人？

溫秀琴： 高毛子罵挑擔人。

范增： 喔！高毛子罵挑擔人！

溫秀鳳： 係啦係啦！（手指張煥）高毛子罵（手指後台）挑擔人！

張煥： 嘿！講來講去，厓張煥顛倒變做高毛人！

范增： 囉哩囉嗦，走開！厓問汝兜，有一个郎中黃連坤个妹仔黃蘭英，聽講佢係本莊出名个靚妹仔，佢有來摘茶無？

溫秀琴： 恁毋靚好，因為佢同年衰个身體毋鬆爽，蘭英過去佢个屋家照顧佢。敢問范老爺尋蘭英要做麼个？

張煥： 續毋知，厓老爺係分人招个，生到一表人才，年過三十還旨有賴仔，想要尋一个靚靚个細妹仔來做細姐傳香火。黃蘭英佢个同年衰躑奈位？

溫秀鳳： 對面山个瓦屋就係徐秀才屋家。

范增： 徐秀才又係嘛人？

溫秀鳳： 徐秀才就係蘭英个同年爺，也就係徐紹雲已經過身个阿爸。

溫秀琴： 徐紹雲佬蘭英兩儕青梅竹馬，感情盡好，范老爺，厝勸汝還係另外選別个小姐。

張煥： 汝兩姐妹要毛遂自薦乜還做得！

△張煥做偷吃鬥腐科

溫秀鳳： 啐！討打！

△溫家姐妹將張煥打倒，張煥掙扎爬起科

張煥： 哎喔！惡嬖姐！佬頭家娘有比喔！

溫秀琴： 也毋去打探清楚，厝爸頭擺係義民軍个教頭呢！

范增： 哼！自細到大，厝想要个東西，還無人敢佬厝搶，這個黃蘭英，厝若係有看中意，厝聘金擲過佢屋家肚，秀才个賴仔算麼个腳數，厝用錢就做得佬佢磧死去！

張煥： 嘿嘿！老爺，厝看這徐紹雲佬黃蘭英兩儕，無分佢兜厲害試看仔做毋得！

范增： 狗奴才！厝還旨見過面个靚晡娘，汝敢教訓佢，皮佬厝繃緊兜仔！

張煥： 係！係！頭家！厝个意思係講，這近水樓臺先得月喔！汝毋遽兜仔出手，厝驚怕汝會像孫權嫁老妹……

范增： 仰般講？

張煥： 到時恐驚人財兩失！

范增： 嗯！有理！遽遽，來去徐屋尋人！爲討美嬌娥……

張煥： 毋怕錢銀無。老爺請！

△范曾、張煥下

溫秀鳳： 蘭英姐佬紹雲哥郎才女貌，盡登對，厝看這隻飯甌佢喔，呆狗想食豬肝骨！

溫秀琴： 人生到醜，又過爲富不仁，蘭英毋會看上佢。

溫秀鳳： 就驚佢變鬼變怪用陰个手段，還係要提醒蘭英姐提防佢正好！

溫秀琴： 無毋著，時間無早，恩俚遽遽摘茶！

△溫家姐妹採茶下

第二場 茶蟲

景：大坐（一桌三椅）

人物：黃蘭英、徐紹雲、徐母、范增、張煥

△徐母上唱【蛤蟆歌】

徐母唱： 貧賤家庭運來磨喔，夫盡早來過身，
寡婦來多操勞哪唉唷，咬薑又啜醋，
不怨天不怨地，撫養紹雲志氣高喔唉唷！

蘭英出世在山中喔，哀盡早來過身，
父親來做郎中哪唉喲，蘭英與紹雲，
情相投意相合，天涯淪落命運相同喔唉喲。

白：老身徐氏，夫郎係本地秀才，夫妻結髮，降下一子名喊紹雲，不幸夫郎得病來撇世，留下厝母子兩人相依為命，在此山上種茶維生。夫郎个同年黃連坤，降有一个妹仔名喊蘭英，蘭英廿十歲，佢个阿姆就來過身。講起來厝兩家人个命運盡相同啊！蘭英與紹雲兩人兩小無猜，情投意合，已經也到婚配个年紀，衰過恩兩家家貧如洗，到今還旨有錢銀好辦佢兩人个婚事。前幾日仔厝到山頂放勢割草，續來熱到無鬆爽，到今還無辦法去園頭園尾，紹雲一儕人去做事，毋知做仔忒無？

△黃蘭英背竹籃上唱【上山採茶】

黃蘭英唱：急啊急啊完係忙哪忙離呀門庭喔哪唉喲
離啊了啊完係門哪庭將呀藥尋喔哪唉喲
敢啊緊啊完係遽哪遽煎哪藥湯喔哪唉喲
服啊侍啊完係同哪年哀哪老人喔哪唉喲

白：到此已係，待我進入。同年哀！蘭英見過同年哀！同年哀身體有較好無？

徐母：蘭英，汝仰無去摘茶，到這來看厝老人家？

黃蘭英：紹雲哥昨晡日同厝講汝熱到，人無鬆爽，厝打早就去尋藥草要來煎藥湯分汝食。

徐母：蘭英實在真曉得。厝歇睏幾日仔無打緊，害汝盪忒一工人無摘茶，頭家茶老忒發譴，厝就罪過！

黃蘭英：厝已經拜託溫家姐妹幫忙，應該無問題正著！

△黃蘭英煎藥，范增、張煥暗上偷窺。

△【平板】

黃蘭英唱：秀琴秀鳳來幫忙，比人四儕還較強，
定著摘到頭家暢，請汝來將寬心放。

白：藥湯煎好了，請同年哀來食藥湯。

△黃蘭英服侍徐母喝藥。

范增：嗯！生到盡靚，盡溫柔，厝盡中意！遽遽來去請媒人婆去佢屋家提親。

△范增、張煥暗下

徐母：蘭英汝真慶喔！這藥湯食起來甘甘毋會苦，厝歸个人一下仔都變到輕鬆起來咧，喔，精神來囉！

黃蘭英：汝還係做毋得操勞過度，要多休息正好，汝佇這坐，厝落來去煮飯。

徐母：承蒙汝哪！

△黃蘭英下

△【山歌仔】

徐母唱： 蘭英聰明又賢惠，可比解語花一蕊。
只嘆家貧無所費，蹉跎佢歲月感克虧。

△徐紹雲背茶簍上

徐紹雲唸：茶園剷草到半暫，看到茶葉小綠蟬，
綠蟬盡細盡難捉，專專啜這正必日，
綠蟬食過个茶菁，短短幼幼毋會靚，
歸埗茶園就來著園，著園个茶菁賣無錢，
可嘆蘭英等厝兩三年，誤佢青春實在真可憐，
唉！阿媽身體無康健，恐驚肚飢心火煎，
丟忒山事起腳花，遽遽回轉家門前。
阿媽！阿媽！這……這…….麼个味道啊？

徐母： 呆賴仔！汝柶壞了係無，這係飯菜个香味！

徐紹雲： 嗯！真香！阿媽，汝仰恁勞碌，身體無鬆爽還煮飯煮菜！

徐母： 汝鼻較真兜仔，這敢係阿媽煮个味道？

△黃蘭英上

黃蘭英： 紹雲哥！

徐紹雲： 蘭英！係汝煮个？

黃蘭英： 嗯！看汝走到汗流脈落，簍公放下來，厝佬汝擦汗！

徐紹雲： 蘭英！厝…厝…

黃蘭英： 紹雲哥，有麼个話做汝講啊！

徐紹雲： 厝對不起汝呀！

黃蘭英： 好好點點，做麼个講恁見外个話？

徐紹雲： 唉！汝看這簍公底背著園个茶菁！蘭英！聽說呀！

△【曲牌】 徐紹雲敘說

徐母： 哎呀天哪！厝正幾日仔無去巡，歸埗茶園就著園，今年夏茶佬冬茶
毋就賣無錢！唉！衰過！

徐紹雲： 厝本想：今年春茶意好賣，等到白露過，冬茶賣忒，會有多少仔錢
銀好春，到年底將汝討過門來，誰知茶園著園，婚期又要拖過一年，
蘭英！厝對汝毋起呀！

△【平板】

唱： 緊想富貴離緊遠，春去春來年過年，
花枝總開別家院，不嫌不棄不埋怨。

徐母： 命運仰專門來苦毒恩俚窮苦人啊！蘭英，厝毋盼得！

黃蘭英唱： 看到老人噉哀哀，蘭英心肝結歸堆。
雖然前途有阻礙，冷露打來大風吹，
蘭英請汝莫心灰，打起精神想將來，
紹雲本是種茶才，蘭英也係摘茶妹，

同心協力除蟲害，生路定著能打開，
富貴貧賤厝志不改，定扶紹雲上个青雲梯。

白：紹雲哥，簍公分厝。這著園个茶菁雖然賣無錢，但是一枝草，一點露，天無絕人之路，厝轉去同厝爸參詳，研究看仔，看這茶菁有麼个功效無，汝兜等厝个消息，切莫過傷悲！

徐紹雲：蘭英，汝比厝想个過較有志氣，厝同阿姆毋會向命運認輸，恩俚兩家分頭進行，看有麼个好辦法。

徐母：唉喔！飯菜冷忒咧，先食晝，食飽飯正有精神來想辦法佬茶蟲鬥。

徐紹雲黃蘭英：來！共下食飯！

△眾人同下

第三場 逼婚

景：小坐

人物：黃連坤、范增、張煥、媒婆、黃蘭英

△黃連坤上

黃連坤唸：碧雲天，青草堆。山色連天，天上浮雲開。
湖映斜陽天接海，山水無情，更在斜陽外。

白：老夫，黃連坤，後生時佬厝个同年徐秀才徙到這山林定居，但在此山中種茶，厝採草藥做郎中維生，雙人娶妻降子，倒也安貧樂道。不幸同年佬夫人前後得病，藥草無效，十年來，厝佬同年嫂各自撫養孩兒，望佢兜長大成人，能親上加親來結做親家。妹仔過去同年嫂屋家恁久無轉，真是使人愁慮！

△范增、張煥（背包裏）、媒婆上唱【雜貨節】

范增唱：黃家蘭英實在靚，身材苗條傾國城。
煞煞轉去媒人請，無討蘭英厝會無命。
哎……唷，無討蘭英會無命。

張煥唱：老爺錢銀實在多，甘厝背到背駝駝。
背分老爺丈人老，見到一定笑呵呵。
哎……唷，見到一定笑呵呵。

媒婆唱：上氣毋會接下氣，媒人走到會斷氣。
牽條紅索結連理，新郎笑到目絲絲。
哎……唷，新郎笑到目絲絲。

范增：到咧，毋使過唱咧，張煥，去喊門！

張煥：喂！底背肚有腳个！行出來！

媒人婆：啊喔～恁樣喊門？厝个財神爺會分汝喊走忒去！

張煥：無要仰般喊？

媒人婆：來！厝教汝！……喔～親家且姆！婿郎來咧，遽遽出來迎接！

黃連坤： 喔！外背嘛人喊門？
媒人婆： 親家，王媒婆做媒人來咧，遽遽開門！
黃連坤： 王媒婆喊門，敢係同年嫂請佢來个？厝等這日等到鬚都白忒囉！遽遽佬佢開門！
稀客稀客！請入來坐！
范增： 婿郎見過丈人老！
黃連坤： 旨要正，王媒婆，這位公子毋係徐紹雲，佢係嘛人？仰會喊厝丈人老？
媒人婆： 厝來介紹，佢係范增范老爺，係新搬來个大財主喔！佢个田園大到斯～雕仔都飛毋過喔！汝妹仔嫁過去做夫人，汝就做得坐等翹腳抹鬚鬚囉！
黃連坤： 此事萬萬不能，厝妹仔佬徐紹雲已經有婚約在先，無可能再許配他人哪！
張煥： 老夥仔！這包錢係厝老爺送个聘金，汝莫敬酒毋食食罰酒！
范增： 丈人老，徐紹雲屋家苦到痲痲肚，蘭英小姐嫁分佢連睡目个眠床都無，要仰般過生活？還係嫁分厝享清福較贏！
黃連坤： 厝妹仔要仰般過生活毋使汝操心，錢汝拿轉去，送客！
張煥： 唉哉！恁硬殼啊！厝老爺看中意汝妹仔係汝个福氣，汝答應也好，毋答應也好，三隻月以後……
范增： 毋係，夜長夢多，做麼个要等三隻月？
張煥： 頭家娘再過三隻月就要去英國料，汝係講這下就討細姐，係分佢知喔，命會分佢收忒！
范增： 係唷！个隻惡嬖姐惡起來會豺人呢！
張煥： 老爺「金屋藏嬌」个屋乜要時間來起呀！
范增： 係啲！還要偷偷仔起一間新屋。
張煥： 老夥仔！厝老爺三隻月以後花轎就會來討佢，汝要早兜仔準備！
黃連坤： 呀呀吓！汝討打！

△黃連坤和張煥開打，媒人婆從中勸架。

媒人婆： 毋好相打，毋好相打！有話好講，有話好講，親家……

△黃蘭英背茶簍暗上目睹後面動作

△媒人婆夾在中間勸架被兩人打中昏倒

△范增摸媒人婆鼻息，計上心來，對張煥比手勢不可聲張。

范增： 喔！丈人老！人死忒囉！

△黃連坤驚愕科

黃連坤： 人死忒？

范增： 人係汝打死个，汝係要同厝到官府去告官，也係將妹仔嫁分厝，厝花兜仔錢佬汝脫罪呀？

黃連坤： 男子漢大丈夫，敢做敢當，厝同汝到官府去！

范增： 好！厝同汝去告官！

△范增偷做手勢叫張煥勒死媒人婆，范增拉黃連坤欲下

黃蘭英： 且慢！放開厝父親！

范增： 喔～看在厝靚晡娘个份上，厝先放過汝！

△范增放開黃連坤

黃連坤： 妹仔！

黃蘭英： 阿爸！汝莫急，恩俚先救人正講。

△黃蘭英救醒媒人婆，比出張煥要勒死她動作。

黃連坤： 上天庇佑，汝無死！

媒人婆： 啊喔！

黃蘭英： 哼！汝這兜恁大个膽，也想謀害人命嫁禍分厝爸，還有王法無？

范增： 慶！汝毋單淨靚，汝還意精明，既然看破厝个計謀，厝也毋使佬汝客氣，黃蘭英，厝佬汝講，想要徐紹雲兩姐哀平安，汝最好就乖乖聽厝个話，三个月後上厝个花轎，哪係無者，汝就等著佬佢兜收屍！

走！

△范增、張煥下

媒人婆： 阿姆哀！厝毋敢賺這隻媒人錢！黃小姐，多謝汝救命之恩！厝要去廟項燒香壓驚，汝佬徐家也要早兜仔做打算！

黃蘭英： 承蒙汝个提醒，厝自有打算，王媒婆順行！

媒人婆： 阿姆哀！佛祖保庇！

△媒人婆下

黃連坤： 蘭英，好得汝轉來，係無阿爸就落入佢个圈套了。

黃蘭英： 唉，屋漏偏逢連夜雨，爛船又遇頂頭風！

黃連坤： 汝還靚到嘛个事情為難？

黃蘭英： 阿爸！紹雲哥个茶園著園，汝來看！這係紹雲哥仔茶園捉到个蟲仔，還過著園過个茶菁。同年哀為到這件事情噉到盡傷心，毋知要仰葛煞就好。汝採過盡多草藥，知盡多藥草个功效，請汝試看仔，看有麼个藥仔做得來除忒這兜蟲仔。

黃連坤： 厝一時也想毋出來有麼个方法，先落來去，等食飽夜正來慢慢研究！

黃蘭英： 阿爸請！

△黃連坤、黃蘭英下

第四場 做茶

人物：徐紹雲、黃蘭英、黃連坤、徐母

第一景：山景

△徐紹雲背竹簍扛鋤頭上唱【老山歌】

徐紹雲唱： 濛煙散盡南風吹，山花點落青石苔。
揚攆穿花樹林外，麻牯樹蟬叫比賽。

△【平板】

綠葉浮塵蟲爲害，歸園茶菁無幾袋，
日日除蟲做癡獸，毋知仰般正應該。
日夜想盡千條路，來到茶園旦旦無法度。
蘭英等厝空閨守，望穿秋眼心中苦。

白： 蘭英佬厝兩人真是好事多磨呀！

△徐紹雲鋤草捉蟲

△黃蘭英提食籃上唱【梳妝臺】

黃蘭英唱： 手攞飯兜上山岡，山岡情郎將蟲防。
剷草入肥捉蟲忙，小綠蟬啊真狂妄，
逼得大家無主張啊得喲。
茶園收入出情況，婚期遙遙難指望。
范增又要將婚搶，大惡霸啊勢力強，
兩下爲難費思量啊得喲。

白：紹雲哥！山事放下來，來食晝！

徐紹雲：蘭英！汝當工來送飯分厝食啊？

黃蘭英：紹雲哥啊！

△【五更歌】

黃蘭英唱： 日前蟲害盡嚴重，郎个心頭無輕鬆，
思前想後想毋通，蘭英心中似石舂。

徐紹雲唱： 蘭英情深意盡濃，紹雲感激在心胸。
只歎天公來作弄，鳳凰禁錮在烏籠。

黃蘭英： 厝佬父親兩人研究殺蟲仔个藥草，尋來尋去，對這細細隻个綠葉浮塵子實在也想毋出方法。還過……

徐紹雲： 還過仰般呢？

黃蘭英： 紹雲哥！有一个人，汝一定要提防佢暗害。

徐紹雲： 啊？厝家貧如洗，平時無佬人結冤仇，仰會有人會來暗害厝？

黃蘭英： 唉，只怪厝紅顏薄命，係厝拖累汝呀！

△【曲牌】 黃蘭英陳述科

徐紹雲： 如此說來，汝要多加細意呀！

黃蘭英： 曉得！

徐紹雲： 想來想去，全係厝無錢正會害汝分人欺負，厝種這兜茶頭有麼个祿用！

△徐紹雲生氣砍茶科

△【綁傘尾腔】

黃蘭英唱： 看見紹雲喔就紹雲喔就紹雲哥！
看見紹雲茶頭刺，心肝可比刺利刀。

黃蘭英： 紹雲哥，這係汝辛辛苦苦種出來个茶頭，做毋得放棄，紹雲哥！

徐紹雲： 蘭英！

黃蘭英： 人講大富由命，細富由儉。積少成多，無著園也好，著園也罷，
恩俚佬這兜茶菁摘轉去，茶菁賣無錢，恩俚來自家做茶，做茶做得賺較多啊！

徐紹雲： 恁簡單个道理，厝就想毋通，莫怪財神爺無要照顧厝！蘭英！汝真是厝个好蘭英呀！

黃蘭英： 紹雲哥，恩俚來共下摘茶！

△【紗窗外】

黃蘭英唱： 與郎茶園來摘茶
徐紹雲唱： 茶芯短短著園茶
黃蘭英唱： 各樣各色採回家
徐紹雲唱： 不怕辛苦來做茶
合唱： 兩人同心協力將把茶來做，做成上等个色茶
徐紹雲： 天暗咧，來轉屋家做茶！蘭英，路毋好行，簍公分厝背，汝牽等厝个手恩俚共下來轉。

△做山路摸索前進科

徐紹雲： 面前要過溝喔！
下歧咧，慢慢行！
要上斷囉！
到平路咧！

△第二景：徐家

到厝屋家咧！共下落來去！阿姆！厝轉來咧！

△曾母、黃連坤上

徐紹雲： 同年爺汝來咧！

曾母： 仰做到恁夜正轉？害同年爺愁羅蘭英過來尋人！

徐紹雲： 同年爺，蘭英今晡日想出一隻賺錢个方法，覩好要請汝來指導。

黃連坤： 喔！講來聽看！

徐少雲： 厝佬阿姆逐年種茶，摘茶菁賣分人做茶，賺个一些些工前定定，若是厝學會做茶，自家做茶賣茶米，係毋係做得賺較多呢？

徐母： 自家做茶、賣茶米，賺較多這厝知，毋過，恩俚毋識做過茶，做出來个茶敢賣有人買？

徐紹雲： 同年爺做藥材恁多年，對溫度佬水份个掌控盡有經驗，這做茶个技術要勞教同年爺指點啊！

黃連坤： 無毋著，做茶要注意茶菁个改變，盡多工，這兜茶菁要先分佢「走水」，過一暫時間還要「浪菁」，會當無閒喔。

徐母： 原來同年哥汝曉得做茶，有汝這隻師父出馬，厝毋使愁咧。先食夜，食飽正來慢慢教！

徐紹雲： 蘭英，汝也來共下學。

黃蘭英： 奉陪！

黃連坤： 哈哈哈哈哈！

△眾人同下

△過門音樂

△黃連坤、徐紹雲拿箝箕上 鋪茶菁、浪菁

△黃蘭英、曾母拿火筒木柴上 起火燒柴

△【撐船歌】

黃連坤唱： 走水浪菁無相同，做出茶色無共種。
萎凋輕輕係包種，萎凋重重係烏龍～嘿呀囉的嘿，
嘿呀囉的嘿，嘿呀囉的嘿～係烏龍

徐紹雲唱： 無經發效係綠茶，經過發酵係紅茶。
發酵輕輕有花香，發酵較重水果香～嘿呀囉的嘿
嘿呀囉的嘿，嘿呀囉的嘿～有果香

黃連坤白： 續下來就要來「殺菁」，同年嫂，蘭英，火要燒較猛兜仔啊！

曾母白： 火燒盡猛囉！

黃連坤： 紹雲！茶菁掉落火鑊肚！好炒茶囉！

曾母唱： 樵火燒著火盡猛，炒茶為到要殺菁。
除忒生味與硬梗，炒出香味來放勢拚～嘿呀囉的嘿
嘿呀囉的嘿，嘿呀囉的嘿～放勢拚

黃連坤白： 茶炒好要用濕个茶袋裝起來揉

黃蘭英： 揉茶換厝做。

唱： 濕个茶袋會降溫，放佢惦惦來回潤
揉捻輕重要有分，布團揉過有較韌～嘿呀囉的嘿
嘿呀囉的嘿，嘿呀囉的嘿～有較韌

黃連坤： 解開茶袋，將茶解散拾開來，用火屎慢慢焙分佢燥。

△眾人合唱【瓜子仁】

眾人唱： 種茶摘茶過做茶，春茶夏茶併冬茶，
青心大冇茶，包種烏龍茶
煮茶泡茶來品茶呀，食杯茶呀啷鏘啊依呀依啷啷～
食杯巖茶聽採茶啊啷啷

黃蘭英白： 茶焙燥咧，哎呀！這著園過个茶菁做出來个茶米還靚啊！

徐紹雲： 係呀！一條一條，看起來就像白毫烏龍樣。

黃連坤： 烏、白、黃、青、紅，五種色彩，真是罕見！

曾母： 看起來恁靚，食起來毋知仰般？

黃蘭英： 泡一罐試看！

△蘭英泡茶，眾人喝茶

曾母： 噃！茶色看起來盡靚喔！
徐紹雲： 鼻起來有熟果香
黃連坤： 食起來有蜂糖味喔！
黃蘭英： 恁好食个茶…….
徐紹雲： 恩俚成功咧！恩俚成功咧！
眾人： 成功咧！

△眾人歡喜下

第五場 膨風茶緣

景：街景

人物：阿土哥、阿土嫂、溫秀琴、溫秀鳳、陳阿龍、李阿保、范增、張煥、
徐紹雲、徐母、黃蘭英、黃連坤、王綢緞、梅香、媒婆、迎親對伍

△溫秀琴、溫秀鳳、陳阿龍、李阿保上唱【山歌仔】

溫秀琴唱： 昔日採茶到山岡
溫秀鳳唱： 茶菁尋無茶袋裝
陳阿龍唱： 因為茶袋交姑娘
李阿保唱： 雙雙對對鳳求凰
溫秀琴白： 頭家娘今晡日發摘茶个工錢，姐妹共下去領錢。
陳阿龍白： 范增佬張煥這兩隻豬哥，厝看到就火，汝兩儕要去佢屋家，毋觀好堵到要仰般？做毋得，厝驚汝兜會吃虧！
溫秀鳳白： 無厝兩姐妹做白工係？
李阿保白： 厝保護汝共下去就做得啦。
溫秀琴白： 好啦，厝看汝兩儕秤不離鉈，共下來去！
陳阿龍白： 厝佬汝也鉈不離秤，請！

△范增、張煥、王綢緞、梅香上

王綢緞： 有福之人人服侍，無福之人服侍人！阿老公！工錢發忒，事也做到差毋多咧，厝要坐船去英國看朋友，厝無佇屋家个時間，汝毋好佬厝變鬼變怪喔，係分厝知著，厝喔命就佬汝收忒佢喔！
范增： 毋會哪，晡娘姐！厝喔一定乖乖佇屋家毋會亂走。
陳阿龍： 哼！陽奉陰違。
梅香： 溫秀琴、溫秀鳳，恁堵好靚到汝兜，這係汝兩姐妹个工錢。
溫秀琴： 承蒙！
梅香： 小姐，工錢全部發忒咧。
王綢緞： 轉來去準備坐船去英國。

△梅香下，王綢緞下場走到一半回頭看范增。

△張煥對范增偷偷比畫溫家姐妹身材苗條動作。

王綢緞： 阿老公！汝還毋轉去看麼个東西？

△范增沒聽見

范增： 張煥，汝看中意這兩姐妹，厝看，黃蘭英比佢兩姐妹還較靚！

王綢緞： 汝講嘛人較靚？佬厝講清楚！

△王綢緞扭范增耳朵，范增對王綢緞求饒撒嬌。

李阿保： 看到無？惡人就要惡人磨！

溫秀鳳： 嘻！盡生趣，恩俚惦惦看下去。

△四人偷笑

△梅香跑上

梅香： 小姐，小姐！大消息！聽講本地一个茶農，用著園个茶菁做出一種茶，去台北總督府參加茶葉博覽會，總督府評鑑以後出兩百個个銀正佬佢換一斤茶呢！

范增： 膨風个哪，奈有可能！兩百个銀，該做得換幾多擔米呢無？

梅香： 係呀！大家人聽到，佬姑爺想法共樣，乜講佢係膨風个，但是……

王綢緞： 但是麼个？

梅香： 該位茶農去台北以前屋家盡苦，連想討哺娘都無新房，這擺轉來，佢包袱攞盡多錢，還講要請人起大屋準備結婚呢！

溫秀琴： 係紹雲哥！

溫秀鳳： 係蘭英姐！

范增： 哼！強盜！賊仔！一定係佢到外莊做強盜也賊仔，正會兩下半有恁多錢！

張煥： 係啦係啦，一定係佢到外莊做強盜也賊仔，本莊出到這種个人實在見笑，老爺，恩俚去佬佢捉起來！

范增： 著著著，厝去喊較多兜仔人來捉強盜賊仔爲民除害！

△范增、張煥藉機下

王綢緞： 汝姑爺奈樣時變到恁熱心？毋像勢喔！滕去看！

△全下

△徐紹雲上唱【八月十五賞月光】

徐紹雲唱： 台北呀展覽啊真風光哪哎喲，身背等重包袱想起娘
思想起蘭英姑娘是哪哎喲，哪哎喲喲
思想起蘭英姑娘是哪哎喲，先起新聞房是哪哎喲
再娶厝新娘是哪哎喲，一陣哪金風啊來送爽
心肝暖洋洋哪哎喲，哪哎喲喲
心肝暖洋洋哪哎喲。

△范增、張煥、打手上

張煥： 就係佢！佢个包袱底背肚个錢全部搶過來！

徐紹雲： 哎呀！堵到強盜咧！

范增： 做賊仔个喊捉賊仔！佬屋打！

△打手和徐紹雲開打，張煥、范增從旁偷襲。

△溫秀琴、溫秀鳳、陳阿龍、李阿保上

溫秀琴： 係紹雲哥！

溫秀鳳： 遽遽去救紹雲哥！

△陳阿龍、李阿保加入徐紹雲陣營打，雙方打成平手。

△王綢緞、梅香上

溫家姐妹： 頭家娘！誤會，佢係屋个朋友毋係壞人，請汝喊佢兜莫過打！

△徐母、黃蘭英、黃連坤、媒人婆上

黃連坤： 喔！同年嫂，這隻惡霸就係來逼蘭英嫁分佢个范增！

王綢緞： 汝講范增逼蘭英嫁分佢？

媒人婆： 係呀！佢騙屋去做媒人毋成，屋還險險分佢害死。

溫家姐妹： 頭家娘，這係真經个！

△王綢緞氣憤上前阻止

王綢緞： 范增！還毋佬屋停手！麼个呀！要逼人嫁汝，汝食屋个、用屋个、還敢想要討細姐，屋今晡日就佬汝休忒無要汝咧！

范增： 晡娘姐，屋毋敢咧！

王綢緞： 梅香，分佢一百兩銀佬佢逐走！

范增： 啊！屋苦！

張煥： 老爺！

范增： 屋分汝害死！

△張煥、范增下

王綢緞： 徐公子，聽講汝著園个茶做到盡好，屋用街項一間磚仔屋佬汝換十斤。

徐母： 汝……汝要用街項一間磚仔屋佬屋兜換十斤茶？

眾人： 無膨風？

王綢緞： 無毋著，屋要帶去英國送朋友。

眾人： 帶去英國送朋友？

徐母： 屋……

△徐母樂昏

徐紹雲： 阿姆！阿姆！

徐母： 紹雲！遽遽來去摘著園个茶來做茶。

黃連坤： 同年嫂，莫恁急！紹雲正轉來，分佢歇睏一下仔。

徐母： 無諾，屋想要早兜仔摘孫仔！

媒人婆： 便媒人要分屋做喔！

溫秀琴： 恭喜喔！蘭英！

陳阿龍： 還有屋佬秀琴个乜順續拜託汝。

黃蘭英： 恭喜啊，秀琴！

李阿保： 匡佬秀鳳乜要拜託汝！

眾人： 恭喜啊，秀鳳！

△眾人大笑

梅香： 媒人婆，一到賺三隻紅包，還好哪！

媒人婆： 這係膨風姻緣！

眾人： 膨風姻緣！膨風姻緣！哈哈哈哈哈！

△眾人同下

△奏迎親音樂

△范增、張煥爛竽充數和迎親隊伍上

△阿土哥、阿土嫂、梅香、媒婆、王綢緞、徐母、黃連坤上

△以結婚典禮進行謝幕

劇終